

SPORT

Bogn d'Alvagni: turnier da golf dalla Fundaziun Paul Accola

Dar a golf per en bung scopo



En stos padregns per treis golfists tgi on paea per dar igl turnier ena bela somma. (da san.) Reto von Arx, hockeyaner, Arno Del Curto, trenader digl «HCD» e Marco Rima, cabarettist.

● **G.N.S. Personalitads da sport, dalla cultura e dall'conomia on paea ena somma considerabla per sa participar agl turnier da golf da sonda passada. Digl retgav da chel turnier profiteschan talents da sport tgi on igl potenzial da far carriera ed otras instituziuns da sport.**

Paul Accola, è sto en skiunz popular, betg angal percheigl tgi el ò gia success cunzont ainten las cursas da cumbinaziun, mabagn percheigl tgi el era pitost en tip original. Er schi el è sto egn tgi geva magari atgnas veias ò igl skiunz da Tavo gudagnea igl classamaint general digl cup da skis 1991/92. Per ansomma neir schi gliunsch

aint igl circus da skis dovrigl betg angal talent, mabagn er sustigns da tottas varts. Paul Accola dei tgi er angal en pitschen ageid saptga esser decisiv per la carriera dad en gioven sportist. Cun chel intent ò igl anteriour skiunz institua avant seis onns la «Fundaziun Paul Accola», tgi promova sportists giovens. Rimno daners per chella vign cunzont cun organisar occurrenzas noua tgi la prominenz da sport, dalla cultura e dall'conomia s'inscuntra. Tar egnna dallas occurrenzas impurtantas totga igl turnier da golf agl Bogn d'Alvagni, noua tgi igl retgav da chel vo cumplet an favour dalla fundaziun digl skiunz, tgi ò termino sia carriera igl 2005.

Noms ancunaschaints

Per sa participar agl turnier da golf paia en golfist 2 500 francs, dastga persiva anvidar anc dus ancunaschaints agl tunier e ratscheva persiva er anc en padregn prominent, tgi gioia communabel igl turnier. Gist 17 golfists èn sa mussos generous è paea per giuier a golf cun blers stars digl «HCD», anteriours skiunzs ed anc blers oters prominents. Dalla parteida èn stos tranter oter Arno Del Curto, igl trenader digl «HCD», igls giuieders Reto von Arx, Jan von Arx, Sandro Rizzi e Petr Sykora. Cun Dario Cologna è sto dalla parteida er en victour digls gis olimpics 2010 e mantgea on er betg igls fardagliuns Dominique

Gisin e Marc Gisin, tgi appertignan agl cader da skis naziunal. Vasia agl Bogn d'Alvagni ins ò dantant er ena rotscha sportists tgi on durant onns gia bler success, scu per exaimpel l'antierioura skiunza Maria Walliser Anesini.

Radond 50 000 francs

Migra vess l'atmosfera betg savia esser er cun avoir la prominenz en bellezza de per dar a golf. Unisono on tots detg tgi seia daveiras en plascheir da giuier a golf sen chel plaz an Val Alvra. Cuntaint è er sto Paul Accola, igl iniziand digl turnier, la seira cura tgi el ò fatg bilantscha. Radond 50 000 francs ò igl turnier purto alla fundaziun, tgi dat ossa gio seis onns. Chegl seia en bela somma per sustignier er aint igl avignier sportists tgi vessan igl talent da far carriera, vegian dantant betg igls meds finanzials persiva, ò accentuo Paul Accola. La fundaziun sustigna er adegna puspe instituziuns da sport e projects da sport aint igl Grischun. Egn digls puncts culminonts è alloura stada la rangaziun digl turnier da golf. Gudagnea chel ò Peter Minder, igl commentatur da «SF» cun sies team, avant Maria Walliser Anesini e Walter Vesti, cun sies treis partenaris. Agl our digl tunier è nia surdo a treis talents da skis grischuns mintgamai en premi doto cun 2000 francs. Ratschet chel premi on la skiunza Arina Riatsch da Sent, igl passlungist Corsin Hösli da Zernez e Jan Scherrer, igl snowboardist da Tavo.



Er tranter igls prominents è stada Monika Fasnacht, la moderatoura da «SF». Fatg cunaschienscha cun ella ò Albert Soler, da Savognin, tgi è sto per muteivs professionals agl turnier da golf.



Igl star tranter igls stars da sport tgi on giuia sonda passada igl turnier da golf per en bung scopo è naturalmaitg sto Dario Cologna (dretg). Cò cun Urs Keller, anfignen avant curt trenader digl CB Surses.